

國朝駢體正宗續編

國朝駢體正宗續編序

古來文人才士往往高語秦漢下視齊梁李士恢請革文
華譏此風雲之狀陸雲駒所見制作譬諸涓澮之流不知
良工運斤神自契於造化巧冶鑄劍光且燭乎斗牛雅材
代興我

朝尤盛南城曾賓谷先生嘗輯駢體正宗一書頽波獨振
峻軌遐企芟薙浮豔屏絕淫蠅取則於元嘉永明極才於
咸亨調露鐘金齊奏弗淆晉楚之聰珉玉並耀特具卞和
之識固已闢塗徑於文囿示模楷於藝林矣然而鑒裁精
審尙止乾嘉以前蒐選叢殘未逮道咸而後裒錄僅四十
二家曠隔已八十餘載時厯屯亨人務鑽厲雖巨筆較少

於疇昔而彫章仍煥於當今體氣高妙庸詎無前哲之風
杼軸清英頗不乏後來之秀豈皆趨異逐新迷真離本者
哉但使魚龍百變天外天矯錦繡千堆人閒零落王楊名
儕四傑罕事網羅崔李價重一時靡加甄采紀思遠手停
於鈔寫向巨達力艱於積聚是則桐懷逸響恐難免入爨
之災竹有異聲竟不獲知音之賞抑或哀萃誇多權衡失
當蕪穢不除榛楛勿翦妍媸互呈其姿貌剖析莫極夫毫
芒求珠於水而礫石同登簡金於沙而泥滓雜出斯又牛
溲馬勃兼收未足珍奇虬戶鵷闥僻語轉增鄙累爾吾友
張君公束涉獵四部研窮六朝有禁邪制放之意無愛古
薄今之心攬眾製於緇繩發佳篇於緋槧遂取時賢之作

以續曾氏之書揆集宏富持擇謹嚴約而不濫華而不靡
風清骨峻者非顓門而亦存文麗義睽者卽宗匠而必汰
扶質立幹振葉尋根鬱飆起霞蔚之觀懼驚集雉竄之誚
摯仲洽深明流別能定去留劉季緒非好詆訶善撫利病
撰次八卷勒成一編罔不六律諧協山谷可調允宜萬古
流行江河不廢也夫漢魏遞降奇偶共貫故徐庾直與賈
董而聯鑣唐宋相承駢散殊科自韓柳卽從燕許而奪席
旗幟各立格調屢變藻繪愈工飢馘彌甚末學黥淺徒效
伎於俳優單慧汎剽惟飾容以鉛黛旣支離而構辭亦索
莫而乏氣苟勿整派依源懸規植矩幾何不溺音騰沸盡
類巴渝之謳縟采紛糅競炫紅紫之色則是編也其猶大

輅之椎輪中流之底柱乎余與公束組織夙習酸鹹同嗜
曾偕商推謬預參詳粗識雅鄭之聲略辨淄澠之味梅亭
標準遜此典美水心叢珠無其簡要剗剗竣事誣諉弁言
爰染柔翰用述大旨將見繼曾氏往刻後先紙貴也已溧
陽繆德榮

國朝駢體正宗續編目錄

嘉興張鳴珂公束輯

第一卷

南城曾賓谷

煥

文三首

贊雨茅屋集

萍鄉劉金門

鳳詒

文一首

存悔齋集

秀水王仲瞿

曇

文四首

煙霞萬古樓集

錢塘陳雲伯

文述

文一首

昭文孫子瀟

原湘

文一首

武進李申耆

兆洛

文三首

養一齋集

閩縣陳恭甫

壽祺

文二首

左海文鈔

嘉善黃霽青

安瀾

文一首

第二卷

錢塘金亞伯

應麟

文三首

豸華堂集

嘉興沈匏廬

濤

文二首

十經齋集

會稽王律芳

衍梅

文三首

綠雪堂集

桐城劉孟塗

開

文四首

涇縣胡時棟

貞幹

文二首

上元梅伯言

曾亮

文三首

柏枧山房集

第三卷

陽湖董子詵

基誠

文二首

移華館集

陽湖董方立

祐誠

文四首

移華館集

平湖徐辛庵

士芬

文一首

陽湖洪幼懷符孫文一首

海甯陳受笙均文一首

吳縣曹稼山埜文一首

仁和龔璫人自珍文二首定庵集

固始蔣子瀟湘南文一首

嘉興錢新梧儀吉文二首衍石齋集

平湖黃鶴樓金臺文四首木雞書屋集

第四卷

大興方彥聞履錢文十首萬善花室集

臨海宋确山世榮文一首

寶山袁穀廉翼文四首邃懷堂集

吳江董夢蘭 兆熊 文四首 味無味齋集

第五卷

南海譚玉生 瑩 文九首 樂志堂集

泰興吳和甫師 存義 文三首 榴實山莊集

江陰何廉昉 枻 文二首 梅餘庵集

吳縣馮林一 桂芬 文二首 顯志堂集

桐城許綺漢 麗京 文一首

海鹽黃韻甫師 變清 文一首

南康謝蔚青 質卿 文三首 轉蕙軒集

第六卷

鎮海姚梅伯 變 文九首 大梅山館集

江甯汪梅邨士鐸文四首

長洲顧子山文彬文一首

德清俞蔭甫樾文二首

甘泉李冰叔肇增文一首

震澤蔡聽香召棠文一首

歸安楊季仇峴文一首

長洲顧道穆復初文一首

江山劉彥清履芬文五首古紅梅閣集

嘉興褚二梅榮槐文一首

第七卷

陽湖洪子齡齡孫文五首涓則齋集

會稽顧祖香

壽楨

文三首

孟晉齋集

山陰王眉叔

詒壽

文四首

緜雅堂集

嘉興徐蘭史

錦

文四首

靈素堂集

第八卷

秀水趙桐孫

銘

文三首

琴鶴山房集

鄞縣郭晚香

傳璞

文三首

金戔山館集

山陰汪穀盦

琬

文二首

隨山館集

錢塘張蘊梅

景祁

文一首

溧陽繆馨吾

德榮

文二首

小岬山館集

會稽李蕓客

慈銘

文一首

仁和譚仲脩

獻

文三首

復堂類集

秀水沈蒙叔

景修

文二首

嘉興許竹簣

景澄

文一首

錢塘張子虞

預

文一首

龍陽易實甫

順鼎

文二首

丁戊之間行卷

國朝駢體正宗續編目錄

國朝駢體正宗續編卷一目錄

光孝寺新建虞仲翔祠碑

例贈文林郎太學生依巖吳君墓表

傷逝銘

阿雲巖館師八十壽集千字文

隋蕭愍后哀文

報工侍吳先生書

與兵侍周石芳先生書

祭光祿大夫素香公文

仙女廟與姬人湘玉書

書陳雲伯重修河東君墓碣後

皇朝文典序

愛石圖題辭續編序

陶雲汀中丞蜀輶日記書後

許畫山硯史序

許周生駕部鑑止水齋集序

慰託集自序

國朝駢體正宗續編卷一目錄

國朝駢體正宗續編卷一

嘉興張鳴珂公束輯

光孝寺新建虞仲翔祠碑

曾燠

上古聖人既綏四裔爰定五宅窮窳之阻幽墨之鄉蓋以放窮奇渾敦者而後世以處屈原賈誼焉異矣哉何荃蕙之化茅而章甫之薦屨乎然屈賈之事多望古而憑弔屈賈之人或進前而不御當局則迷覆轍相尋烏庠仲翔復離此咎吾嘗稽厥身世覈其心迹較之二子尤可悲焉當夫孫氏草創江表動搖朝報魏師夕驚蜀警得人則霸失人則亡士不北投卽將西去固不同漢文之世四海嚮風已仲謀以梟雄之姿席父兄之業屈身忍辱任才尙計操

興生子之歎丕以有人爲憂方將師事子布兄事公瑾聘求名士收拾人心又豈楚懷庸昏專任蘭靳者哉仲翔故伯符之心交明府之家寶也平山越下豫章爲我蕭何言猶在耳及仲謀統事折孫嵩之異志卻曹魏之寵招策糜芳之詐降呵于禁之失節以視三閭大夫僅工辭令洛陽年少欲擅紛更其才其遇又非一致何謗毀之易入而忠直之不容也至其徙交州也禦千里之蝮蛇望九關之虎豹命輕形悴髮白齒落然且注經行世講學授徒未聞卜居之辭亦無惜誓之怨而于谿蠻宜討遼海無功憂在國家同于疇曩使仲謀而仁者當膺宣室之召以免汨羅之沈乃仲翔雖不葬魚終焉賦鵬不其悲乎夫仲翔何罪罪

在直諫耳以聞先聖立木之政哲輔從繩之言人臣事君有犯無隱然而折檻伏蒲祇爲僅事菹醢屬鏹有同成迹何也庸主多闇英主多猜闇則厭惡之根猜則讒閒之漸也仲謀之爲英主其孟德之亞乎往時欲殺仲翔嘗引孟德殺文舉爲法鷹鷂之性異地同符是故孟德之害士也非獨文舉季珪正平之類並就刑誅仲謀之害士也亦非獨仲翔張溫顧譚之徒皆罹重譴要其獲咎必由慙直士生三國所謂遭時不祥哀哉雖然仲翔一時無知己而干載之知己多矣一時無弔客而干載之弔客多矣維此訶林傳爲虞苑民思其人猶愛其樹固宜鑿井得泉建潮郡昌黎之廟雜蔬薦荔享羅池刺史之神祠成迺書其事貞

諸樂石

例贈文林郎太學生依巖吳君墓表 曾 燠

在昔唐代藝文存孝友之傳益都人物著耆舊之篇董陽
篤行當世爲之表閭崔鄆家法後人因而立社君諱紹祖
字衣言滁州全椒人也讓王采荆蠻之藥遂逃天下之稱
季札就延陵之封實附子臧之義自爾胙土命氏崇德象
賢殺青簡以寫書名父歎其家世麾白羽而渡水孝子斯
爲神仙數典不忘於今爲烈矣祖應正贈奉直大夫父璵
贈承德郎君以王符之學而無外家周顗之才而奉少母
童年就傅入澤編蒲天性過人登筵懷橘八歲丁外艱毀
瘠幾死弁人之孺子泣宣聖以爲哀中路有嬰兒聲曾參
感其哭加於人者一等從其至者三年旣而裴秀屬文能

事嫡母陳思賦句不怨長兄雖復蒲麻貯衣豆其然釜而
扇枕溫席卒蒙正室之憐讓棗推梨彌篤同枝之愛耕作
如汝敦裁留園地數十畝分財若曇首但取圖書數千卷
君曰吾少時所治意所戀也嗚呼古之明德何以加焉若
夫戒姪之書類鶩類狗贈妹之作如蘭如芝鄰里有喪則
麥舟可助友朋告乏則米困可指孔車爲天下長者仁傑
是斗南一人以茲追配庶無慙德君鼓吹五經笙簧六籍
少時鸚鵡之對客已呼爲小友壯日麒麟之筆世共推以
雄師而乃丹篆鬱胸青錢遺選蓋老萊之樂惟求舞彩溫
嶠之志未肯絕裾北譙古城厥有石室託煙霞於三隱論
服食於八公弔古則清流之關題詩則偃月之洞摩詰之

工作畫自圖輞川孫登之善鼓琴常動林壑故得以采蘭
馨膳樹草忘憂純孝不衰終身而慕年四十九忽丁荼毒
之痛遂至柴毀之疾羅遜以茲而滅性杜棲寢至於傷生
病偏廢淹牀蓐者二十年年六十九卒嗚呼哀哉君三子
長翦乾隆壬子科舉人次寅次櫟皆庠生櫟出嗣其從叔
諱銓府君君一經傳德三絕並名馮道之稱寶儀義方有
教僧孺之見仲郢風矩斯存豈徒誇賈氏之虎薛家之鳳
而已千鍾未逮空廢蓼莪萬古長嗟遂歸蒿里君以某年
某月某甲子葬於某山之原余與其子交故得詳其行事
表之如此

傷逝銘

曾燠

正月向晦東風不暄簷瓦雪飄庭樹煙溼于時匣絃凍折
鄰笛悲聞惡耗頻驚知交繼逝嗚呼哀哉追曩昔之宴游
尋平生于嚮像十年之內四海幾人一別如雨重歡無日
何風流之頓盡嗟造化之若茲思夫白駒過隙黃雞催晨
世何弗新古誰無死乃若樗以不材而壽桂因可食而伐
顏回年短于盜跖孔子慟深于伯牛吾欲問天誰爲辨命
況知己之難得恆曠世而一逢莊子休之寢說時無惠施
管夷吾之舉哀交惟鮑叔郢人既往匠石廢斤鍾子云亡
牙生罷操如吾友某某者昔嘗一日相思千里命駕朝泛
剡谿之雪夜占潁水之星修蘭亭之禊事非無管絃過梓

澤之名園亦多吟詠今則山河已邈人琴並亡將申雞酒
之情時方羈縻欲引虎賁而坐孰是典刑嗚呼玉樹長埋
情何能已棟梁乍折哀更可知遂援豪而寫心諒同氣之
感目銘曰

庾信有言君子先危援今證古天道可知彩雲輕散明月
易虧地下修文必取顏卜天上作記亦聞昌谷以彼當世
不膺顯榮何獨死後見重神明神明能用而不能生松茂
柏悅芝焚蕙歎每誦遺文心神悽惋往時伐木和我歌吟
今茲埽徑無君足音

阿雲巖館師八十壽集千字文

劉鳳誥

南極星明珠衡曜正霄漢翔暉陰陽幹運厥鍾賢佐荷
天寵命鈞宰調和羽儀表盛受

皇多祐

萬福積餘推及臣下沛施攸殊志切皋禹時會唐虞伊鈞
礪者猶難比諸雲巖相公國之元老

龍飛首歲登朝最早再厯丙辰

嘉慶建號綺甲周八年高德劭自少發蹟樹植槐庭詩禮
貽淑孝廉俊聲姿宇澄篤才矩從橫始踐仕籍已振佳稱
近聆

絲言洞習機務豫章察使秉節攝屬改任尋歸鳳池故步

陟在列卿工垂匡助猷爲所達出制分營條枝漠外游牧
其興

敕移定遠居守遙臨曰招遼邈欲釋困顛短扇涼清

寫念寓情事存規則庶席父甯農父場畝丁男莊野市犢
勸穡驅驢杷稼口糧給稅藝畫紡夜飫膳充眠疲離蓋寡
戶宅綏讓幸遵

王化遐荒并壹的收堅昆筍矢抽射黍芒雨紛空同劒嘯
目宿駒飡環逼惶懼終罔躍垣賤投貢遣默克都九水皆
東面銘勒蒙崑於彼西川羌兒倂起本隸土渠聽辱盜匪
隱唱禍基伯兄叔弟冥寂晦靈柰敢抗巨林漆莽墨木城
薄恃奄誅令隨嚴催牒紙用兵神妙獨煩勉慮謂資驥力

必獲鞠罪勿輕俯納頓顙伏耳湯熱肥烹嘗我火器轉經
樓廟傍覆旻毀赤毛骸斬賤妾索背母姑鬱戚孤弱虧靡
禽悲獸弔飊落解委浴暑忘寒盡得方止聞阿將軍莫不
悚畏斯舉威名古誰若是戎績奏可感賴

訓指義車律閏載更夏冬露布續馳祇上

行宮來旋京闕躬履有容入

見帳殿歡對

九重

帝親扶問惠答女庸

手持杯接讌勞成功位超倫等執桓爵封寶石映冠金鱗
盤服兩圓翠飄四氣裳束旣約黃帶亦騰逸足鼓吹競鳴

俠觀

輦轂盈海竟宙碣摩碑讀

紫光壁滿累次貌形

御筆作讚鑒茲忠誠晉大學士宜侍

武英領

文淵職道義熟精青松岱嶽特立真榮內直端謹

書帷師傳典率史官仙宗策府笙瑟墳簡絃牀商呂承平
安閒瞻想纓組嗣辦甘省田洪草賊翳巖藏谷霸據何物
愚別舊新叛卽捕滅鷗傷杳寐羸駭縻結易幾取芥杞根
翦葉秦民息驚蘭州郡邑駕云往迴路引輶軻潔祀沈祭
宣房治河審地卑廣尺寸弗過魚夫鴈婦寥散傾頗籃蓋

雞菜藁夕糠磨號亭薪塞楚阜岡羅去以棠說溫飽並歌
愛也蒸黎育乎樂利孔孟脩途稷尹實濟鉅業良哉致

君密邇每與論思信維政體知人殆詳潛燭妍照涇渭二
流虛緣曲巧黜垢厭浮杜弊貞操銀箱紈染臧恥糟陋肆
愼五刑慈懷求要戒甚處疑谿刻恐效象逐亡羊腸惻飢
鳥嘯感孰通仁能惡好陶養益性矯俗航善動靜優焉此
中恬淡嵇阮翫譏韓魏馨晚非慕洛圖且似絳縣退食羔
素道疏弁巾左徘徊右徊囊畫理琴矜伐謝諂謙吉盟箴凌
霜白髮拱

日丹心曠眺園梧月初生魄華旦適當深秋景色法酒彫
飯筵張坐設恆沙因果稽拜羣悅被

賞煌煒

字懸絜楹合壁如意無量禪尊衣綵朗麗連璣聚珍仰惟
聖主實康乃身子舍嫡傳惇睦啟後世家具美侈談李趙
升造陞廊桐階絲茂玉堂富貴願而欣笑夙陪賓友交集
門牆語豈假譽辭異陳常竭微恭敬詠雅音長永增百祿
願奉千觴

隋蕭愍后哀文

王 曇

暴君之國不失於好色而失於窮兵大業之亡不亡於荒淫而亡於游幸繁古明婦人之遇其昏主不貽徽音於後世而最可哀者如蕭愍后乎嚮使苻堅納諫則張夫人不殉身於五將之山矣晉帝保家則羊皇后不蒙塵於平陽之虜矣秉起居之筆而帝德難書奏上德之頌而軒轅不悟此述志一賦所爲三致徘徊憂思怨諷於江都之一幸也祿盡則鄧曼先知喪雄則定姜已卜后何不幸而卒與桀宮嬖妾浮海同舟幽王鼓鐘淮海並載邪仰飛行之殿來裸游之宮花方作孽樓已名迷聞一往不返之音揣大鼠阿廢之夢萬寶常所由早泣新聲侯夫人所爲先死於

棟下矣后弱似貞風義能不裸勇非馮后勢不當熊在佩
玉晏鳴之中寫離騷九辨之憂此康后雞鳴悲題永巷班
姬辭輦怨咏離宮一篇之中殆有甚焉及乎變動虎賁兵
交黃屋君薨組練盜踞重門迫伏后於壁中急唐姬於抗
袖哀姜哭市舉國無人穆嬴啼朝何能討賊后於此日縱
幸不被錮金墉懸頭小白亦自當酒飛金屑藥搗宮椒特
以賊在圍中兵須奧助遲十六院幸姬之死俟六十路義
師之旗苟生呼吸延喘須臾捧君王鏡裏頭行借魯國聊
城矢至而化及得斃於夏主降王之一戰也孔子曰女智
莫如婦后之謂歟旣而東道清塵賊臣授首二京立辟共
主分周后不得不乞虜馬以勤王假明駝以靖難始畢婚

姻之親建德君臣之禮連衡老上走馬陰山藉曷娑主壻
之援馳頡利外孫之騎碑盟甥舅酒歆黃龍后不踵向姜
之無歸而法紀姬之大去者春秋之本義也無何夏軍撓
敗黑闥求援突厥以中宮播越奔命窺邊也思亦將置主
中原請君河洛而兩王弑絕一帝禪亡僅受興唐和好之
盟率成昭君歸漢之局而后於是乎路絕蒼梧湘君命盡
天傾杞國哭斷長城矣稽自有唐迎歸故后卒葬於煬帝
雷塘也北史未成隋書未作時無通德誰脩外傳之篇婢
少佩蘭解說宮中之事年湮代隔事舛言訛繼以虞初競
作稗官無稽人惡驕君罪歸孱后遂謂驪姬禍晉褒女覆
周不知宣華拜賜一物早可亡商寶兒愁生再顧已傾人

國亡陳嬪御豈少於孫皓之後宮晉陽江都不減於石虎之女部后姪謝婧英妒非昭佩席多莫蔽房大難專野雉興沛中之漢焉用才人茗華覆夏桀之宗何關妹喜耶或謂后德性能詩才華作賦何以世基佞佞竟無諫書化及觥觥不關諍草不知垂簾殺杜非先后之聖明冒絮誅嬹豈中宮之盛事而況后和熹紙墨僅可書生甄后筆硯惟堪博士倘急以未央縛信之謀速來華歆搜壁之禍后之驚怯斷不爲也或謂化及毒旣逞君慘當及后何以懷娠仍女出寶無逃嫫祖元妃道路無死則安知不少典龍迷高辛狗嫁在昭儀豹尾之中有臥榻人酣之偈保不伯明篡室寒浞縫裳文芊勞軍息嬹從楚乎不知化及者隋宮

劫賊周室忠臣黑獺殺蒺藜明月前事可懲景陽收叔寶
麗華後車可鑒江都之弑所謂齊襄復九世之仇必不效
伍胥蒸昭王之母也亡人可蠱豈令尹振萬之時四國交
爭亦蕭同作質之日爾裴寂主晉陽宮事或有醜聲呂后
在項羽軍中不聞失行況后之詩明禮習者哉或又謂小
君失位尤物移人延壽史書何以建德妻忌載諸后傳不
知建德以作賊之才義能殺賊以勤王之烈忠與封王聊
城之遜后迫於甘夫人小沛之窮路隔乎慎夫人邯鄲之
道而建德稱臣拜舞先馬受驅出榆翟於雲臺衛弓刀以
侍婢良以休屠尙有名汗河朔幸存驕主后縉藉有一成
臣靡力能復國此遣使朝伺移兵救洛釋隋官文武萬員

宮人萬指者堂堂乎王者師也唐書謂建德妻不衣紈身
惟脫粟明建德婦夫有英雄之用無帷薄之嫌也或又謂
突厥之俗但知啗牛胡人之禮不知敬母后乃非細君而
和戎敦王嬙而出塞何歟夫婦人越境固經禮所不宜女
事邇戎亦春秋所必戒不知后與義成僅此姻親相爲休
戚身不能鳴弓射鳥逐馬牽裙且蒙荆棘以來歸但頓王
庭而告難庶幾乎呼韓勢面烏孫抱馬而啼也聽戚夫人
出塞觀歸之典所謂寶建德有回生起死之恩歟若以雞
泊一過疑文姜之會禚穹廬萬里譬隗氏之居溫者嗚呼
冤矣以今觀之小憐下嫁者宮妾之奇聞玉兒配軍者嬪
嬙之恨事后死法三妃生歸一穴縱復下齊辛癸猶能上

軌英皇使雞臺從死之魂作萬古迷樓之案猶其幸歟嗚呼周天子一月御八十一妻闢國則三婦受其美名宋甯宗一夕幸三十九人有才則楊娃傳其姓氏后何不幸而生以才死死以名傳也

報工侍吳先生書

王 曇

尼山門下養徒三千太史奏來賢人五百昨先生示書謂
手放八榜獨心國士此孔融之昵禰衡謝鯤之泣衡玠非
門生之福也盧植學於馬融而不得窺後列之女樂彭宣
學於張禹而不得聞後堂之管絃俱無師恩皆登儒傳先
生獨不記迦葉升座阿難夜悲南能傳衣秀師擲鉢乎前
謁邸第見閹者屏某門生於門外而延曇於後堂擲粥則
感郭泰之仁枕膝則彰孟喜之過樊儵弟子皆是公卿鄭
元門人誰非國器而使見愛者爲處囊之錐見不愛者出
公超之市曾子之門豈無吳起荀卿之徒或有李斯則他
日拂衣之惡割席之怨非教曇兄事子產弟畜灌夫之盛

意也登劉備於上牀勢必揖張憑於下座六月河間奉書謂丁寬何以東歸楊時何以南去曇之東歸東中丞之招南去蘇方伯太守之聘也今之幕僚古之徵辟無宣明之面而居青油之安有僧孺之賢而容樊川之狂十倍於長安索米中書伴食矣前歲同門王以鎔榜發

上皇帝命御前進卷另選一榜而先生呈勘落卷曇在第二非東舉師闔門待罪伯相公伏蒲請

恩則當日張文朱武魏玉孔金一時黜落科場異聞曇爲詭遇此力辭別榜之中書而不願也羊長和不遑被馬帖騎潛逃阮光祿已走方山追之不及古之畏影今之救寒乎曇聞羊綬佳士不登謝公之門楊濟駿人畏入當陽之

座而今愛士者纔一聞黃憲於人言卽力拔孟嘉於座次
十金之雉而以爲鳴鳳也楚王賓之矣蒙童之鶴而以爲
能舞也羊公譽之矣究而言之郭子元懸河瀉水語議無
窮衛洗馬噉柎搗薑膏育有病壘之炫耀自貽感爾西園
之游見柱國止車門外置狂生第四車中此何平叔熱湯
汗面之時王文度手版倒持之日若非顏回一座先聞仁
祖其名何致西堂百人惟問伏滔何在耶太史公曰世言
蘇秦異異事多附蘇秦班孟堅亦曰世言方朔奇奇事皆
歸方朔不知語許元度於曲室之中才情自別進張孝廉
於撫軍之座名理全無先生以殷浩手巾拭謝郎面汗丞
相有帳中之客參軍非入幕之賓也庾征西料事方皇豈

暇消停盛暑何驟騎文書不暇焉能應對元言七月從東
撫軍至厯下魯婦人髻而哭者二千家檀鄉青犢之賊戰
於鄖陽氏根白雀之妖廕於來鳳此范氏史所謂廣賊橫
行正皇甫嵩朱儁投袂之時陶謙梁衍獻規之日討匈奴
以自贖出都亭而待罪毀鬬子文一令尹之家立槐里侯
蓋一世之業散折像之財空糜竺之富揮黃金如拂汗以
犒軍出美人若宮衣以賞士韋丹貨宅魯肅賣田破波才
禽彭脫谷靜山空讓功驕將冠鐵負鎖歸命司敗然後書
牘背而乞恩止畫室以埃命使今日稱郭況家爲金穴他
日不作劉宏論爲錢愚策之上也鄢陽不能藏畢世之金
鐵門不足守燕陲之穀潰瘍雖痛勝於內食留香不錫豈

能愛臍如此而竇憲之罪晚蓋於雞鹿班史之功亦銘鼎
於燕然此董崇之策而寇恂可以自全孫鑠之謀而石苞
可以無禍不然鄧氏鑄山豈無一簪王衍留車亦難三窟
策之下也藥味嘗卑藥言獻貴塗麻油掌上豫見吉凶聽
浮圖鈴聲先知禍福所以佛圖澄游諸石之間視同鷗鳥
竺法深入簡文之座看若蓬門先生愛一狂狷士而欲成
其未有之功名豈不愛一大柱國而保終其百年之富貴
哉先生之言又曰

帝堯九十而倦勤則大夫七十而致仕此先生以經典析
疑弟子敢以史策問難宋史司馬光王陶皆以五十求散
地呂誨五十有八范鎮六十有三歐陽修六十有五富弼

六十有八皆不至七十致仕而時愛大臣者鷗鳥之賦陳振所獻赤松之詩魏仲所廢圖五湖而恭公納節咏生辰而持國歸休雖少年之言莫聽實退位之佛可作蕭嵩從容之言莊敏止足之謂王晉平山資已足羊叔子盛滿爲憂良史嘉之至若田豫七十纔留賢路崔咸門生忽贊退休比夜行於鐘漏恐描畫於後生又稍晚矣褚淵中書而在期頤之後周侯末歲而歎鳳德之衰此周易甘臨之憂係遯之疾也先生倚馬萬言全牛一目召元武司馬班固敕南宮東觀曹褒數十年矣張載文章遠鑄劔閣劉寬待講久在華光以今比古李元禮天下龍門是非名教庾子躬城西公府名士門庭大江以南一人而已爲疏廣則祖

道都門爲賀監則鑑湖一曲豈徒南山之蕨淞水之鱸哉
曇審比方干狂非陳亮有五千卷崔儵之書無三十乘張
華之博上馬殺賊下馬草露布是所好也左手操龜右手
執馬尾非其時矣是以匹練吳門吹簫吳市豈不欲抗禮
將軍長揖丞相一筒餌拜都尉五斗酒得涼州所謂應龍
以屈申爲神鳳凰以嘉鳴爲瑞虞翻不能避糜將軍之船
而能避糜將軍之門也太山之雷穿石積燬之火爍金楊
匡郭亮天下以爲美談胡廣趙戒千古以爲口實以是脫
雞冠而辭仲尼立虎韉以竢王儉遲先生於機雲二山之
閒淞泖兩湖之上左太沖招隱之詩孫興公遂初之賦徘徊
五夜馳驅一書

與兵侍周石芳先生書

王 曇

西園謁別承以尙書尺牘介交淮南鹽樵又承以細生出處譽薦河隄水工良士陽烏戀南塗馬知水緣是未稅邗江先遵睢上八月二十五日見菰圃尙書於河澨行臺時也田蚡視水延年之策太多汲黯治河淮南之病不減命寓河干恭候

章下九月八日伏聆

諭旨不準人員納草投効相如慕黃霸一卽之資未籌買臣學西施半肩之薪莫負餐珠析桂遐想龍門背阪面墮積傷蟻慮磬十九年袁宏土窖之情敘五十歲孟郊無官之故初良士之待詔公車也不欲碎胡琴於都市者欲爲

端人不忍彈鬱輪於主家者畏非佳士是以麒麟甯糜身
於魯經渥洼不自媒於漢殿語曰相馬以興觀臣以主此
良士始入京師逡巡趙趙於時相之門者豈期埽門魏勃
未見曹參懷刺禰衡已逢黃祖嘉慶四年以師門芥蒂之
嫌車後塵囊之垢錯書舉燭誤點飛蠅遂轟薦福之碑忽
破太初之柱當時也腐鼠飛鳶欲亡虞氏箠篲漆匣幾殺
王彪都察院都憲吳師晏嬰民望苟爽人師不先淞水之
鱸致拔仲尼之樹良士梁鴻適越早到蘇州劉超閉門絕
無賓客當日之畏影匿迹救寒止謗江南人士之所哀憐
者已辛酉壬戌復以靜菴少詹之知先生賞愛之酷更生
之傳虞監手鈔會稽之碑范雲背誦幾使劉歆忌口牆甌

莫覆寶融飛書洛陽傳寫矣無如昭君面醜不勝劉白之
圖墨翟書多未免弦唐之怪此東坡典貢舉而李廌無名
永叔修五書而韓通無傳者也李白曰千鈞之弩每發不
中則當摧撞折牙安能效碌碌者蘇而復上哉冠一免而
貢禹不彈門一杜而汜騰不出是以吹簫歸去仍居胥相
之城廡下春來終守要離之墓妾非彩鸞寫唐韻而賣錢
婦是唐寅買丹青而換米擬以爲荀曇禁錮不過終身王
通著書老於河汾可也何圖李衡種橘有賢妻竊笑之時
劉凝隱居無夫婦游山之福一雌忽飛五倫遂絕於是逢
萌迷路不識東西羊曇西州無非痛哭此戊辰辛未以來
挈子拋家重蹈燒龍舊路也昔有勸李賀必舉進士者而

李賀不從亦有勸桑維翰無舉進士者而維翰不聽良士
左思溷上歲歲三篇袁虎馬前年年七紙蓋蘇季十上不
行實陽嶠八科皆中也考漢郡國舉士皆取少年能報恩
者良士四十五歲矣尙能夢中咒柱乎馮唐九十忽舉賢
良唐都百歲居然待詔未必然也舊年都下讀先生山西
程式諸刻人則郝隆滿奮盡是高才文則橘柚檣梨無非
美物加以攀安提萬說項推袁幾幾乎曾凱下第欲爲釘
足稱冤王褒愛才竟與門生擔飯矣良士胸中柴棘大半
是

國家經濟之書夢裏江湖小試亦治世農桑之具無柰柏
耆杖策不曾遇裴度於淮西馬周年華不忍諂常何於幕

府覩黃河積石之難思睢水囊沙之計乃復逍遙河上徒
賦清人黎陽亭邊空歌瓠子是又詭遇不得驂王良之轡
異途不能呈卜式之身良有然也凍蠅不翼沖天之飛焦
堯不救夸父之蹶仍歸舊隱有地蒔花欲上揚州無錢跨
鶴祇申忉怛馳念安和不宣

祭光祿大夫素香公文

王 曇

元戎麗極仙源輝玉牒之圖華嶽崩雲天漢泣銀潢之冑
國以宗老爲尊天必假耆臣以壽蓋長生者泰壹之神不
死者國皇之宿乃勿令緣圖益算於軒庭紫府乞齡於義
宙國喪雄陶人思風后豈佑其後者能昌介其躬者弗厚
仙闔難排靈穹莫敬如吾素香光祿府君之棄吾制府長
公季昆而逝也一則班超萬里軍中讀馬服之書一則黃
霸三年江表手鳳陽之計毀容侍娶含賄匪親纒髮承衾
桐棺莫附蓋河湟遠而岷岵悲淮泗歸而蓼莪賦竟使孝
王伯仲慟闕禮於飾終百藥壙篋爲奔喪而徒步用是青
芻縮醖寮侶摧膺白馬流蘇寅官孺慕者也公傳賚鹽梅

皋颺肱股懷平當之經濟學出天人資卻穀以詩書才兼
文武世紀伐於功宗身起家於民部薛生兩鳳翊家國之
羽儀荀毓雙龍惠熙朝之霖雨是非后軒夢駑驅羊出牧
伯之才抑猶趙夙生衰愛日照江南之樹繫公啟宇手種
三槐卽伯巡方天承八柱越稽我長君制府長公之撫我
江南也碧幢紅旆初開幕府於臨安鐵鉞琬戈遂築節樓
於吳會人歌杜母羨斂胥蠲民頌倪寬贏逋不督察蟲盤
覆地之冤洗蟻穴黃沙之獄秉墨吏于蝨炎屏譚官以鷹
逐陶侃之恭勤軍府檢束豪民劉宏之都督荊州威行南
服於時中官錦彩善政時旌

天子璽書慰勞最篤而又黃龍望府次君有飲水之清紫

馬來南太守有貨船之譽初官司馬江東兩杜之名繼駕
朱幡鳳水三刀之署使郵亭皆畜雞豚俾幹吏俱嫻文句
此非殷家世學盡受訓於劉翁公綽門風定躬陶于孔鑄
者耶

皇上以元齡屏誠贈公光祿之勛韋賢籛金晉貤元成之
爵方喜福時令子永承鯉訓中庭堯叟賢昆長侍阿翁東
閣而公則福天游幻纔蒔少海之桑壽宇迟迟竟騁遼東
之鶴神鴻歸去天上行春赤鯉飛來人間無藥嗚呼痛哉
某等和衷江介有元方父事之尊參佐淮南受萬石官聯
之教認楊公石馬當年隴草增悲望彥先琴牀今日徽絃
永悼蕪辭遠酌思題都尉之碑絮酒空醺敬奠平原之廟

靈駕風來神顏電笑尙饗

仙女廟與姬人湘玉書

陳文述

畫眉竟月判影淡旬眷眷之懷曷云能已憶別玉臺卽登
畫舫暫經虎阜秋氣已深薄暮出關風輕帆利曉至梁溪
漸有寒色長風西來落葉東下艤舟斷潢戢影下渚利鏃
穿牖潑水襲衾塵氛蓋天哮呖連夕翼日稍息方欲解維
舟膠不行河冰四合迴帆古驛問訊鄰舫篙師束手船婦
嗟歎東船西舫近不得語竟夕輾轉舍舟遵陸龍山無影
馬蹏有聲晚抵蘭陵復理舟楫卽夕解纜曳冰而行韻儕
金絲響儷竹月碎玉粼粼盡過舟底大聲驟起雷霆裂石
千聲百狀心魂俱振推篷起視悄無人聲寒月暖空霜氣
流野次日晌午乃抵曲阿津吏惑人云可逕達行未二里

萬檣不前岸高日稀知未解凍斂手而噓抱影而息晨復
登輿竟指京口三山黛色飛落襟袖出自西門市塵雲合
循麓而下直達江滸晚霞西橫暮潮東上狂飈激蕩時作
怒聲王事靡盬不遑啟處乃狎白浪逕登紅艫夕陽將下
風力忽止浮玉一峯麗若翠采背陰則半作黛容迎陽則
盡作金色歸鴉四起半逐去帆寒雁一聲時答柔櫓晚抵
瓜步已上鐙火乘月而行將四十里夜至揚州城闔已闔
僦居旅舍寒氣逼人鐙寒不花酒冰無味痠蝨緣壁時來
嚙人客子憔悴能不悵悵次晨入郭言訪舊雨立談數語
行李已戒渡河卽行炊黍已達地有古祠舊祀仙女花檉
塵凝玉座苔黯彼何人斯志乘失攷羅郁仙詩蘭香靈蹟

碧雲天際彌復恂恍所思不見如何如何過此百里當逕
海陵一舍而遙乃至雉皋辟疆公子小宛麗人水繪廢園
聞有遺趾晨書暝寫再緘魚素凍星窺窗殘墨在紙玉人
天際臨穎主臣

書陳雲伯重修河東君墓碣後

孫原湘

自昔蒼梧高殉節之雲祠崇斑竹新息誓復讐之水廟祀
桃花綠珠一井圓潔淳波紫玉孤墳貞香沁土匪獨標其
勝蹟抑亦勵彼頽風河東君者當建封化烏之年矢代國
摩笄之志時則狐蜮含沙鼠牙肇釁鴟鴞入室鵲卵瀕危
君念碧玉留身則承嗣之覬覦不絕元音碎首則嚴武之
恚憤方消於是帶挂貞枝粉書聖壁芟夷族難解散仇謀
雖使莒婦報夫荀女就義曷以過焉或病其書校枇杷曾
填樂籍歌迎楊柳本隸章臺生已含瑕死甯論節不思梁
家金鼓比洗氏之知兵毛惜蛾眉學貴兒之罵賊白圭尙
可磨也青樓豈無人歟黃鵠七載未聞夜半捐生燕子十

年終欠樓頭一死如君者可謂蓮花不染芝草無根者已
或病其投刺黃門催妝畫舫恥同帷幕事類桑中不思珠
貴投明禽須擇木紫衣虞候識李靖之英雄綠綺當壚爲
相如之佳耦但使節高晚蓋何容議刻泉邱彼盧江旣敗
而入宮阿紀不言而終嫁杜秋娘詩題金縷沈阿翹曲奏
涼州視此爲何如哉或又病其捐軀不早引決已遲與其
殉夫身後看江令之簽名何如誓死君前當朱游之和藥
不思太傅將裁夫人入阻疊山尙在李氏敢先君指劒瀝
誠握繩諷義而蓮池水清庭芝求死而不得梯雲火滅應
獠墮地而猶生遂使沈郎慙婢帥之言張谷負新聲之諫
至於朝雲說偈伴白髮之坡翁潤玉長齋授青園之梵行

識者可以悲其遇已君葬所相傳在秋報門外拂水莊故
址之側末裔式微叢冢摧敗嘉慶庚午之歲錢唐陳君文
述來宰吾邑百廢具修爲政多暇乃偕同志海甯查君揆
金匱華君麗植披拂荆榛裒益壘土武擔攢鋪五丁表石
鏡之門靜樂叢鄉一抔掬牆陰之土於是礱文石碣昭示
來茲所以表義烈重風教也段橋芳草客澆蘇小之魂香
徑紫蘭人奠真孃之樹信都道上寵奴可呼蘭昌宮前雲
容斯在況才節如君者而聽其黃茅煙鎖青燐風飛金盃
飄零玉鉤沈沒耶湘忝隸茲鄉樂聞勝事竊慕青綾之義
用題黃絹之碑庶幾絳雲遮處霜楓連齊女之墳紅豆生
時春燕識玉京之墓

皇朝文典序

李兆洛

大園不言星雲爛然實代之言大方無紀河嶽迤邐以爲之紀其在于人精者曰文下挾河嶽上昭星雲所以經緯宇宙炳朗絲綸者也其儒墨之訓彫琢之詞畸人術流之馳說春女秋士之抽思皆一花一葉一翮一蚊各有可觀而非其至者矣拘學之士閉門距躍高指月窟卑詮蟲天囿於所習得少自足或服習卿雲揚摧燕許祇襲優冠競陳芻狗於

朝家寶書鴻典曾未或窺是猶不覩建章宮之千門萬戶而妄意蓬室爲璇臺不聞鈞天廣樂之洞心駭目而拊掌巴渝以軒舞也曩廁庶常竊抱此愧閒搜司存冀有采獲

旋出宰邑斯業廢然罷官多暇憶之耿耿比游維揚聞此
土前輩先有纂集亟求而觀巨帙充几登縣圃而案玉入
鮫淵而數珠矣就其輯錄小有乖紊遂加釐次以類相從
都若干篇爲七十四卷羅列務盡非有取舍其所未備俟
諸博求卷之大小不齊蓋留編續之地焉其於掌故以當
中郎獨斷資之遺翰或同伯厚指南豈戴園履方之倫夸
于創見庶大雅宏達之彥遂其乃心云爾

愛石圖題辭續編序

李兆洛

嗟乎逝景遙遙百年短短壑舟一運石火猶遲雖復追嗜
好於平生寄音容於模寫拙豪述德越世論交其爲周旋
抑已悽矣學愚王君珞珞自異硜硜守中居閒懷礪齒之
風敷衽盡他山之益爰以高塵之賞圖其置壑之歡當其
高齋客來勝友輩集銜杯宴笑解帶舒懷或矜冰雪之思
或動龍蛇之筆傳玩既習篇章日增宛然在焉思之如昨
乃日月代謝存亡奄乖一時同游相繼淪喪令子守靜虔
奉斯繪逾于球圖求之其儕續有吟誦騰芳摘錦斐然成
編所以垂不朽於令名永孝思於見似何其仁也諸君子
津津道善翹翹慕賢過從厚於荀陳製贊等於僑肸又何

其誼也而要以君貞白之雅磊砢之襟足以被清風於沒
世結遙思於聞聲使人不能自已焉然而披章散句尋其
姓名綴牘多後進之稱味言非疇昔之侶金堪擲地詎泉
下之能聞人願同歸豈九原之竟作昔人有言身後榮名
卽時杯酒胡可比也豈不亮哉竊根觸於眾作又遭盡於
凋年粼粼可數不啻齊安道中茫茫奈何何處穀城山下

陶雲汀中丞蜀輜日記書後

李兆洛

九能之士是說山川百家之流特重輿地述征撰行作者所由斐然也至是皇華原隰並入諏諮誦訓刑方藉知謠俗魁能碩彥尤加意焉夫耳目所構皆關性靈語言所抒惟資神理而研詞者騁詭麗侈博者矜遠奧考據者逐細碎夸論者耽新奇驚于一途通之則窒固才力之偏至實神明之寡要耳中丞此書矩步前規作非剗始而奧窔自闢獨寓風裁通和味宜服之嗜欲苞廣谷大川之氣勢宣政治弛張之所當究古今成敗之所原又探本禹蹟疏通桑酈經生之所聚訟形家之所揣摩片言洞徹萬結立解詞表纖旨經百思而愈深言中鴻律俟千載而不惑此豈

與夫驚聲釣世者同日語哉性靈淪則覃思咸茹神理超則虛塵皆吐也然則公之所以經緯彝憲陶甄羣生因俗以成化開物而成務者略可見于此綴學之徒窺美富而末由挹淵襟而覺潤其爲沾溉不亦多乎

許畫山硯史序

陳壽祺

昔玉紐篆於帝鴻金匱書於尙父苞符旣吐石墨斯鐫洎夫銘申李尤翰染王粲方樛梁武之圖圓製邱遲之句點黛文字曜明典章由來久矣其後詞盈縹帙事輯青縑則易簡勦譜於文房唐詢著錄於北海高氏箋成於嘉定曹昭論泉於辰沅上紹君謨永叔之編下沿之彥秀穎之譔然而柳公題品首第青州唐積繪圖祇陳歙石自青花抱水肇長吉之高吟碧鏡連漸標咸用之麗製由是縉雲葉樾專譜端溪襄陽元章獨裁硯史三巖玉林此其職志後有作者莫能尙已予友畫山許子博物齊張繩祖媿范屬游越海之溼遠攬斧柯之奇其地也峽束靈羊潭翹飛鷺

控蒼梧之重嶂夾黃圃之深坑靈竇無風瑤草自綠幽巖
過雨琳腴皆青雖玉卵星排久傷於山骨而珠泉月孕仍
沐於煙華是時某太守適來剖竹命濟同舟號召鬼工鑱
發天液運斤癭人之手轉縋龍伯之淵瀉翠濤於九秋割
紫雲以千片馬肝滴髓叩蒼砥而鏗然鴈眼浮漚洗春波
而欲活遂乃貯雪池之方室歸玉谿之山房晨霞競蘋暮
天一碧風瀾近手落花紅黏霧縠吹痕漂墨黛起以君有
仲任著論之才爲王鞏求銘之請寫蚌胎及犀角羞龍尾
與鳳咮徧錫嘉名積成盈卷凡硯若干枚得銘詞若干首
壺裏九華奔騰於紙上袖中東海吐納於几前斯可纂璧
友之閒評補淬妃之外傳也君登進士第鑄匪矮桑現宰

官身癖同顛米鬱林之石豫擬於他年洮河之壺稍分於
疇昔注老氏知白之旨悟其猶龍佐子雲草元之辰隨以
吐鳳所謂得綏山一桃亦足以豪者非與若壽祺者金聲
難擲黼理未章慙銅雀之詩名乏玉堂之新樣石交可託
幸遇乎故人墨妙無倫心傾乎大雅乃知吳融八韻虛矜
古瓦之姿洪适三書難擅盤洲之刻

許周生駕部鑑止水齋集序

陳壽祺

鑑止水齋集者吾友許子周生所爲詩也周生清門高廕綺齡英妙言有壇宇行束圭璧畊道獵德華春實秋程曾通難五經張衡覃思靈憲自帝魁世錄孔甲遺書宛委銀編頻斯玉簡羽陵綿裘延閣鑑勝莫不囊括典文津涉潭奧任末經苑傳昭學府靡得專美於前矣旁究靈樞兼通梵夾曹衣稍染牙微偶弄迨出緒餘發爲歌詠寬而靜廉而謙恭儉而好禮肆直而溫良淵淵乎擲五際揜羣雅之才也然吾有感焉當嚴尊方伯敷厯外臺紀綱左轄君常佐餽堂北潔羞陔南七年客滇八載踰嶺四瀆涉再五嶽登三綵裙屐於韶年集脂膏於美蔭藉使效王謝之輕華

慕原嘗之豪舉逐名聲之韁鎖捐幽贊之弦韋觴酌陵波
於前絲竹抗墜於後雄氣雲涌激情風烈攬馬首而龍睇
撫魚腸而虎趯胸吞雲夢蹠蹋太華豈不足以駕八廚之
名士傾四姓之小侯而乃遠性風疏清修雪白胡威侍質
猶詢匹絹吳祐隨恢不營汗簡諷讀習戴宏之音綺紈非
班伯之好宮商間作山水方滋物疏道親室邇人遠集中
諸作大半得諸趨庭皆神禪其詞蘭茝其質輦輓之習屏
濠梁之氣多茲非知雄者守雌得內者遺外九旋之淵鯢
潘未足窮其深千頃之陂澄撓莫能遷其性乎不然則比
者絳趺始華思補束皙黃籍未滿遽歸子平陟岵非嗟投
簪何速蓋筆者心畫言者心聲所謂鑑於止水猶前志也

由茲以往斟酌大樽沐浴神漢孝于惟孝證道緇林兮之
又兮忘情丹轂將令海內陶化染學激薄停澆豈徒以翰
墨爲勛績詞賦爲君子者哉壽祺俯慙敬禮定文之託仰
謝士安作序之能試濁水以照明珠覆坳堂而容浮芥雖
同臥湖山之側日燭鬚眉之間然乃心如廢井惡免壑譏
而澗媿也

慰託集自序

黃安濤

嗚呼士有攻苦半世奄忽一朝心聲手迹魂魄攸戀末契之託後死之責矣是以簡文傷往爲撰中庶之集元結悼逝爰有篋中之編豈不以不朽之業未竟之志傳之其人是誠在我者哉然而作者如牛毛存者如鳳羽然奇於坑投賀於溷光燄灰滅仇者忌焉籋篋是承醬瓿是覆珍貝芥視愚者憎焉惟仇與愚斯亦已矣若夫生則款款訂雷陳之交沒則懇懇展范張之誼故權在目遺編在牀謂宜表彰有資闕墜無慮顧悠忽者率剗緝之失時倥偬者或編述之靡暇卒之羽陵朽蠹莫證名山之藏竹素叢殘空寄秋墳之唱山邱闕若聲塵翳如昔任昉答劉孝綽詩曰

詎慰耄嗟人徒深老夫託瞻懷斯言良可慨息安濤束髮
就傳過庭聞詩先大夫以置膝之愛示取友之方譚道藝
則踞門而聽啟文讌則執燭而侍譽清聲於弱齒引小友
爲忘年並以竹林俊游薦蘿密昵文字之樂臭味所同歲
月貿遷人琴凋喪旣悲墓草之宿復痛乾蔭之摧茫茫百
端忽忽千古每懷疇曩愴然恨然且念巨源字孤延陵挂
劍氣誼之篤交道稱之文章者性命之事粗匪鄰於玩物
精神之縣鉅幾同於血祀鄭重珍惜宜何如矣安濤宦游
廿年轍迹萬里朋箋每束乎馬背家編恆置乎囊中萍蹤
流轉人事纏迫時時深亡失之懼負因循之疚焉比來高
涼簿書少閒友人吳江潘翁遠道過從舍弟若濟佐理郡

務相與詮次並任校讎爰萃諸編合爲一集將以告諸家
祭質諸幽冥庶幾播芳藝林藉釋沒世之憾信心知已無
慙把臂之言

國朝駢體正宗續編卷一

受業高安鄒淩瀚校